



Duubeschlag

Basler Dybli Fasnacht 2023

Mir mache Strom

Ob Basler, Landschäftler oder Wieschtesoon
Mir hängge irgendwie alli am Strom
Dängg nur ans Händy oder s Internet
Dr Fäärnsee, s E-Bike oder s Trottnet
D Häizig, wo Öl oder Gas duet verbrenne
Das alles wurd ooni Strom nit renne
S Liecht im Yschaschte darfsch nit vergässe
Jä suech emol im Dungle öbbis z Ässe

Frogsch dy als au, wies söll wytergoo?
Wohär dr Saft für das alles sotti cho
Frogsch in d Rundi bi den Aanigslose
Häissts: «Strom chunnt us dr Dose»
Frogsch wiesoo Europa Strom muess schpaare?
S isch nit wägem Russ, s isch wäg de Katare
Wäärend die im Winter d WM-Schtadie chiele,
Huuse mir bi nüünzää Grad, s isch zum briele
Fäält dr Schnee am Wältgöp z Adelbode
Wird är mittem Helikopter aanegfloge
S isch glaub Zyt, dass mir alti Gläis verlöön
Und e biz grieneri Wäg yyschlöön

S feschtigt sich zwoor dr Umwältgedangge
Und Basel inveschiert e mängge Frangge
D Schtadt bschtellt nur non e nöie Chaare
Wenn dä vollelektrisch cha faare
S wird dr Bebbisagg, dasch verruggt
Lutlos gsammet, verschluggt und verdruggt
Als Velofaarer fäält dir jetzt dr Gnuss
Vo dr Dieselfaane hinterem BVB Bus
D Elektroaatriib schtyge däglich an dr Zaal
So isch Basel zwäidusigsiibenedryssig klimanöitral
Derwyylscht im Saal vom grosse Root
Herscht Rootlosigkäit, wie das goot

Mir nämme s Schiggsal gärn in d Hand
Und bewyyse drey Dääg lang fulminant
Wie me mit gezyyltem Handle
Vorhandeni Energy in Strom cha wandle
Berächnige über Uffwand und Ertrag
Findsch uff: www.duubeschla.ag
Mir hänn, in nur wenige Schtunde
Ganz Erschtuunlichs usegfunde
Bloost me fescht in sone Piccolo
Duet e ganze lutte Pfiff entschto
Dernäbe begläitet e Wind dä schrilly Doon
Us dämm erzüügen unseri Reedli Strom
Im Schpöizbalgge sammet sich au Saft
Dä nutzen unseri Reedli als Wasserchraft
Wiirble Tambouren suuber uffem Fäll
Zittered d Luft, d Reedli dräie schnäll
Wänn die Reedli emoll nit dräie
Verplääge mir ys mit Ziibelewäie
Bis dört druus Wind duet entschto
Schpiile mir d Retraite und dr Saggodo
Schnallsch, wies chönnt funggtioniere
Wenn me dr Muet hett zum inveschiere

Was für uns no nit ganz klar isch
Sinn mir autargg oder solitarisch
Dörfe mir dä Strom, wo mir do generiere
In d Belüüchtig vo unserer Lampe inveschiere
Oder mien mir dä ächtscht schpaare
Dass d Schtadt cha d Rääpli in d Verbrennig faare
Oder schpyyse mir die Elektrobüss vo dr BVB
Dass sy nit liige blyybe hinterem Eglisee

Chuum hesch Strom scho bisch im Dilemma
Wär dörf, wo, worum, wiewyl und wenn ha?
So befassen au mir ys mit dämm Glump
Verchaufe mee as mir hänn, und das uff Bump
Das schpielt Gäld in d Cliquekasse
Wo mir am Bummel dien verprasse
Wenn jede mee bruucht, asses hett
Ischs e Form vo russischem Roulette
Mir lööns derby, fertig, Schluss
S'isch alles gsäit, dr Pfuus isch duss

Vom Mäntigzobe bis am Mittwuchmorge lüüchte schön
D Latäärne, wo vorem Münschter uffgräit schtöön
D Requisyte, wie chönnts au anderscht sy
Findsch glyychzytig vor dr Kasärnen, änen am Ryy